

Las prestaziuns dals ospitals èn d'auta qualidad

Ils pazients pretendan nossas linguas

DA LUCAS DEPLAZES/ANR

■ Ina recenta retschertga da H+ conferma ina giada dapli la buna lavur dals ospitals e da las clinics da la Svizra. La populaziun cun dretg da votar è cuntenta cun l'actual provediment medicinal. Las pauschalas per cas han effects positivs. Ils ospitals e las clinics da la Svizra offran prestaziuns d'auta qualidad ed els han in bun renum. Tenor la retschertga da Gfs, Berna, vala quest resultat uschebain per tut las regiuns sco er per las diversas gruppas socialas da nossa communidad. Per 72% da la populaziun èn ils ospitals da fitg groda muntada. 35% considereschan las prestaziuns sco fitg bunas, 59% dattan ina buna nota. Da diesch persunas na vulessan nov betg desister da la libra schelta da lur medi.

Per la gronda maioritad èn las finanzas per il sector da la sanadad publica repartidas gistamain. Dapli meds finanzials pudessan ins metter a disposiziun per la generaziun giuvna e per ils attempads, ha erui la retschertga. 53% vulessan dapli meds finanzials per ils uffants. 45% da la populaziun cun dretg da votar giavischan dapli meds finanzials per ils ospitals regiunals. Mettan persunas en ina buna situaziun da sanadad l'accent sin in bun provediment da basa, pretennda glied cun problems da sanadad dapli medis-spezialists. Tenor la retschertga na vesan las votantas ed ils votants nagins secturs nua ch'ins savess spargnar.

In ospital regional è da gronda muntada

81% da las votantas e dals votants giavischan in agen ospital en lur regiun. Quest ospital duai garantir las pli impurtantas prestaziuns medicinalas da basa ed in servetsch d'urgenza. Per 77% duai ina instituziun medicinala d'urgenza esser cun-



Ils ospitals e las clinics da la Svizra offran prestaziuns d'auta qualidad ed els han in bun renum.

KEYSTONE

tanschibla en 15 minutas. Per intervenziuns fitg spezializadas pon las distanzas esser pli grondas. En cas d'ina intervenziun fitg impurtanta èn prontos dus terz da las votantas e dals votants dad ir en in auter chantun per il tractament.

Il studi demussa che il dumber actual dals ospitals saja acceptà da las votantas e dals votants e che quests sajan prontos da surpigiar ils custs persuerter. 58% van d'accord che las prestaziuns da la medischina da perfecziun vegnan centralisadas. 72% da las votantas e dals votants èn decididamain da l'avis che la Svizra duai procurar senza per in dumber sufficient d'agens medis. 85% giavischan ch'il persunal dals ospitals pledia nossas linguas, sa

tracta quai gea da discurrer davart dumondas fitg persunalas e da prender decisions magari fitg impurtandas.

Las pauschalas per cas han in potenzial da spargn

Economists da sanadad da l'Universitad da Basilea han examinà l'effect da las pauschalas per cas (DRG), introducidas l'onn 2012 per finanziar ils ospitals. Tenor lur constataziuns han las pauschalas per cas augmentà levamain ils tractaments ambulants en ils ospitals. Pertutgads èn ils spezialists e main ils medis da chasa. Plinavant han ils economists constatà ina leva diminuziun da temp d'ospitalisaziun e da reabilitaziun. A lun-

ga vista lubeschia la nova finanziaziun dals ospitals ina reducziun dals custs per var ina milliarda francs.

Las temas dal persunal, exprimidas avant l'introducziun da las pauschalas per cas, na sajan betg vegnidas confermadadas. Il lev augment da la lavur administrativa en connex cun la codaziun possia vegnir cumpensà cun optimalisar ils process interns. La tgira dals pazients na saja er betg vegnida sminuida pervia da l'administraziun, han ils experts sincerà sin la dumonda da l'Agentura da novitads rumantscha. Plinavant na saja er betg sa verifitgada la tema che pazients stoppian bandunar l'ospital memia baud, ha confermà Bernhard Wegmüller, il directur da H+.